

F. F.

DISPUTATIO INAUGURALIS MEDICA
De
EMPYEMATE,

Quam

Divinâ adspirante Gratiâ,

*Autoritate & Consensu**Gratiosissimi ORDINIS MEDICI in Alma
Argentoratensi Studiorum Universitate,*

Pro

Summis in Arte Medica Honoribus & Privilegiis
DOCTORALIBUS ritè consequendis,*Solenni Disquisitioni exponit*

MELCHIOR HURTERUS,

Scaphusâ-Helvetius.

Ad diem April. Anno MDCLXXIX.

ARGENTORATI,

Literis JO. FRIDERICI SPOOR.

VIRIS

Nobilissimis, Amplissimis & Experientissimis,

DN. JO. JACOBO WEPFERO,

Medicinæ Doctori Celeberrimo, Sereniss. Princip. & Illustriss. Comitum, ut & Reipubl. Scaphus Archiatro meritissimo, Facult. Med. Basil. Assessori gravissimo, Patrono, Cognato & è sacro

Baptismatis fonte Susceptori æternum colendo:

DN. EMMANUELI HURTERO,

Medicinæ Doctori & Practico in Illustri Scaphusianorum Republica felicissimo, Parenti jugi honore suspiciundo,

Gratitudinem, observantiam ac obsequium debitum,

hisce Inauguralibus Thesis

declarare debuit,

Devotissimus Cultor,

Obstrictissimus Filius,

Melchior Hurterus.



Σὺν Θεῷ.

THESIS I.

U Trem accuratius explicaturus certiori incedat *Nomen*.
 tramite, à Nominis enucleatione eum exordiri jubet
Galenus l.m.m.cap.5. & 6. & Scalig. Epist. 1. S. I. aliique ar-
 tium scientiarumque Proceres; quibus & nos ob-
 temperantes, de Empyemate dicturi à nominis Etymologia in-
 cipimus. Deducitur Εμπύημα à verbo ἐμπύειν purulentum esse;
 & hoc à πύον pus; quod à πύθω putrefacio: Latinis dicitur Sup-
 puratio, Collectio puris, aut, Græco nomine latinitate
 donato, Empyema; habetque hoc nomen triplicem signifi-
 cationem: in prima & generalissima, omnem denotat sup-
 purationem in quacunque corporis parte factam: deinde su-
 mitur pro ea, quæ in visceribus internis contingit: tandem usus
 obtinuit, ut in specie pro ea puris collectione accipiatur, quæ fit
 in Thoracis capacitate. Hoc enim modo affecti propriè ἐμπυοί
 sive ἐμπυικοί hoc est suppurati seu purulenti appellantur, do-
 cente *Gal. l. de tumor. c. 3. & 4. de caus. puls. c. 9.* his verbis:
*Qui multum puris in capedine inter Thoracem & pulmones collectum
 habent, hos Græci quidem Empyos, latini suppuratos appellant.* Et
 ultimam hanc significationem, cæteris missis, nostram facimus,
 dum de Empyemate agere constituimus.

II. Præmissâ breviter Vocis etymologiâ, synonymiâ & ho- *Definitio.*
 monymiâ, Affectum hunc ita definimus: Empyema est consti-
 patio cavitatis thoracis, à purulenta materia, difficultatem respi-
 rationis, cum tussi sputoque plerumque purulento inducens.
 Unde patet, non quemvis pus copiosum & fœtidum expuentem
 Empyicum esse vocandum, sed solum eum, cui à collectione pu-
 ris, in cavitate thoracis, respirationis organa opprimuntur. Ge-
 nus hujus affectus remotius est Morbus; ad differentiam Causæ
 morbificæ & Symptomatis; Morbi enim requisita habet. Pro-

imum autem, Morbus cavitatis, ut loquuntur, diminutæ; quod nomine Constipationis thoracis exprimitur; siquidem spatium istud pro pulmonum extensione à natura in thorace formatum, à puris copia minus redditur, pulmonesque non in libero spatio moventur, sed in lento pure trahuntur; unde dyspnœa inducitur. Posset quoque videri Morbus meatuum angustorum, dum scilicet materia purulenta in bronchia pulmonum se insinuans, eorum vias minus reddit expeditas: verum, quamvis excludenda non sit illa bronchiorum obstructio, illa tamen demum consequens est, ad notatam Thoracis à materia purulenta repletionem. Atque ita etiam, quamvis aucta magnitudo interdum conjungatur, quidditas tamen Empyematis in ea non consistit.

Subjectum.

III. Subjectum sive pars affecta est ipse Thorax, secundum suam cavitatem seu spatium à partibus Thoracem constituentibus, ut costis, vertebriis dorsalibus, claviculis, sterno & succingente omnes pleura efformatum, in quo pulmones instar folliis attolluntur & deprimuntur ut fiat inspiratio & expiratio: unde facile intelligitur, fluctuante in thoracis capacitate puris copiâ, simul affici pulmones, secundum suas quasdam cavitates; fieri enim vix potest, quin purulentæ materiæ pulmones undique succingentis aliqua portio, raram eorum atque porosam membranam penetret, inque sinus bronchiales & ex his in pulmonum vesiculas dilabatur. Has vesiculas tanta copia adesse *Malpigh.* sedula indagine comperit, ut, si nervi & vasa sanguiflua cum tracheæ ramis excipiantur, tota pulmonum moles vesicularum orbicularium & sinuosarum aggeries quædam sit, quæ talem fitum & nexum obtineant, ut in easdem ex aspera arteria, dein ex aliis in alias aditus pateat, donec omnes in membranam pulmones investientem desinant. Occupatur vero vel universa Thoracis cavitas, vel dimidia tantum, ob interpositionem Mediastini thoracem & pulmones in duas dirimentis partes.

Causa proxima.

IV. Causa proxima continensque est purulenta sordities in Thorace collectæ: hæc vero in omnibus eadem non est: Quandoque enim purum merumque pus, quod album, læve, æquale & quam minimè fœtidum existit, & tale sæpissime post pleuræ abscessum suppuratum, aut disruptam pulmonum vomitum provenit: Quandoque non verum pus, sed purulenta

tantum materia & puri analogum quid colligitur; ut dum secundum *Hipp. 7. aph. 38.* Catarrhi in ventrem superiorem intra viginti dies ad suppurationem perveniunt: siquidem pituita delapsa, coctione crassescens, puris speciem refert: verum enim pus, monente *Senn. l. II. p. II. c. 9.* ex nutrititia fit materia. Simile quid contingit, cum sanguis copiosior in Thoracis cavum effusus, à calore in verum pus converti nequit, sed corruptus consistentiam amurcæ similem acquirit, id quod & *Gal.* docuit in comment. in *aph. 20. f. 6.* sc. non semper veram & proprie dictam suppurationem, sed potius corruptionem esse dicendam, ex qua materia puri analogo generetur. Differt porro materia morbifica, ratione suæ substantiæ; quæ vel crassa, vel tenuis, vel spumosa: coloris; qui vel laudabilis puris notam habet vel lividus est, niger, viridis, subcruentus aut alterius cujusdam: Odoris; materia magis minusve foetida est: Quantitatis, vel major vel minor copia adest.

V. Cum itaque Empyematis natura, ut ex dictis patet, in *Causa remota* puris aut purulentæ materiæ collectione Thoracem constipante *mota* sita sit, in ejusdem causas remotiores, seu antecedentes quoque inquiremus. Plures hæ & variæ sunt, juxta varios & diversos affectus quorum productum esse solet; ut commode Empyema inter eos recenseatur morbos, quos Medici secundarios vel per deuteropathiam appellare consueverunt, qui nimirum sunt producti tali à causa, quæ sit morbus in eodem corpore. Omnes verò morbi quorum Empyema effectum esse contingit, quales sunt Angina, Pleuritis, Peripneumonia, catarrhus, vulnera &c. Vel pus jam confectum elaboratumque intra Thoracis cavitatem infundunt; Vel materiam in pus demum vertendam illuc deponunt. Prius fit post inflammationes partium suppuratas, ut Pleuræ, cujus materia, teste *Hipp. aph. 8. f. V.* nisi in quatuordecim diebus repurgetur, in Empyema degenerat; rupto enim abscessu, viâque per pulmonem præclusâ, in cavitate Thoracis pus colligi necessum est, nisi ad alia loca fiat metastasis: Post Peripneumoniam, cum materia purulenta per sputamina non sufficienter expurgata, unitatem pulmonum solvens in pectoris cavum dilabitur. Idem contingere docuit *Hipp. aph. 10. f. 5.* ex Angina præcedente in Peripneumoniam conversa, quæ si septem

diebus ægrum non interficit, in Empyema transmutatur. Existimandum tamen non est omnem puris copiam, quam Empyici nonnunquam rejiciunt, simul eodemque tempore in dictorum affectuum abscessibus, absconditam latuisse, sed credibile potius, eam à continuo humorum appulsu indies incrementum sumere; major enim interdum est ejus quantitas, quam vel pleura aut pulmones, multo minus faucium partes caperent. Quod egregiè declarat elegans observatio, quam mihi Nobilissimus & Excellentissimus D.D. Wepferus Helvetiæ Æsculapius, Magnus ævi hujus Anatomicus, & noster in Medica praxi Dux, Patronus & Cognatus parentis instar venerandus, pro singulari sua munificentia pronoque bonos quosvis ornandi animo, nuper communicavit. Ille non ita pridem in Illustriss. quodam Comite Vomica pulmonum detento, feliciter verò restituto, notavit Illustr. Comitem intra duodecim dierum spatium puris ad minimum triginta sex libras ejecisse, ex quo Celeberr. D.D. Wepferus meritò concludit, necessum esse, puris quantitatem etiam ab assumtis augeri, non secus ac in abscessibus impuris, fistulis, gonorrhœa, etiam ipsis fonticulis: si enim omne pus quod temporis hujus tractu rejectum est, Vomica continuisset, major supponenda foret quantitas, quam aut pectoris cavitas capere, aut non sine gravissimis symptomatibus ferre potuisset. Hoc & Hipp. docuisse videtur lib. I. de morb. dicens: *fieri in Empyemate ex pleuritide, ut latus exulceratum pus reddat, & ex vicinis locis præ caliditate in se ipsum pituitam adducat, & hæc ubi computruerit, pus spuat.*

VI. Materia in pus demum vertenda, citra prægressam inflammationem intra Thoracis cavum infunditur, dum pituitosæ materiæ à capite aliisque partibus destillationem hic affectus excipit, teste Hipp. aph. 38. §. 7. Forest. l. 16. obs. 49. Claudin. cons. 82. Matth. de Gradi cons. 43. Schenck. l. 2. Barth. Hist. anat. cent. 1. obs. 60. & plerisque observationum scriptoribus: confirmante idem quotidianâ experientiâ. Hoc tamen non verum Empyema, sed spurium seu nothum vocandum esse, dicti Authores consentiunt. vide Gal. Comment. in aph. 30. §. 7. Pituitosus siquidem humor in pectore incrassatus, purulentam simulat naturam, proinde quoque, referente Aëtio, citra febrim hoc malum affligit. Quod si vero legitimum ex dicta causa profectum Empyema statuere veli-

velimus, cum *Massar. l. 2. c. 5.* concedendum, hanc destillationem prius in Thorace aliquam excitasse inflammationem, ex qua deinceps contigerit pus generari; essetque destillatio non immediata Empyematis causa, sed tantum mediata.

Talis verò Empyematis causa sæpissimè est, sanguis post Vulnera Thoraci aut pulmonibus hastâ, gladio, jaculo, globove inflicta, extravasatus atque cumulatus; idque quatuor potissimum ob causas 1. sanguinis crassitiem. 2. ejus lentorem & visciditatem. 3. foraminis angustiam. 4. imbecillitatem ægri non potentis validè satis tussire, quo pus rejiciatur, ut præclare docet *in Exercit. suis Pathol. Ampliss. & Excell. D. D. Sebizi*, Facultatis Med. Senior gravissimus, Professor celeberr. Præceptor, Hospes, Patronus ætatem colendus. Accidit etiam quandoque, si forsan sive ex incuria sive incititia Chirurgorum, externum Vulneris foramen citius præcludatur, quam interna ejus pars sit sanata, unde necessum, ut pus foras effluere consuetum, ad interiora ruat. Et quoniam pus ex sanguine fit, idem effectus sequitur vasorum Thoracis & Pulmonum ἀναστομωσιν, διαπύδνησιν & διαίρεσιν inductam tam ab internis quam externis causis; inter quas frequentes sunt casus præcipitior, violentior percussio, vociferationes, gravioris oneris gestatio, insolita spiritus cohibitio, plethora, evacuationes solennes suppressæ aut præpeditæ, quæ labem pulmonibus aut Thoraci frequenter imprimunt, ut suppressio mensium & fluxus hæmorrhoidalis, hæmorrhagia narium si forte cessat, fontanellæ occlusæ, pustulæ, scabies & exanthemata re-percussa, & his similia, ut passim apud Authores videre est. Quandoque ejusmodi vasorum ruptiones contingere possunt à rebus acutis vel asperis incautius deglutitis, tenellam pulmonum substantiam lædentibus, quod quoniam rarius contingit, ejus rei duo exempla inter *Parentis mei piè colendi observationes* reperta annectere lubet. Ita Ille: Virgo lectissima A. M. B. Anno 1663. nucem avellanam dentibus confringebat; inter confringendum ad risum concitata majorem partem, quam adhuc ad manus habeo, putaminis, imprudens deglutiebat; ob metum suffocationis statim vocatus fui; Ei unctuosæ præscripsi vomitum excitaturus; post bihorium nux in cavum pectoris descendens respirationem faciliorem reddidit; verum in latere sinistro dolorem excitavit; foris

foris & intus applicata fuerunt remedia : Tandem post 4. septimanas putamen pure repletum ejecit : parentes ipsam plenarie restitutam putabant : filia autem medicamenta averfans & ex indulgentia Parentum illa negligens , interim purulenta ejicere cœpit. In consilium, meo suasu, adhibitus quoque fuit Excell. D. D. Wepferus ; varia adhibuimus detergentia & consolidantia , sed nullo cum successu : Ægra enim quotidie sine vehementi tussi totas pelves pure replevit : tandem de paracentesi deliberare cœpimus, quam prædictus celeberrimus noster D. D. Wepferus læpius felicissimo cum successu instituit, & non ita pridem in Xenotrophio, in puero rustico simili affectu laborante instituimus , qui nunc sanus est & robustissimus, Verùm ab aliis fuimus impediti. Virgo longo tempore in misero hoc statu vivens, tandem Phthifica facta in ætatis flore mortua est. Altera observatio hæc est. J. J. W. Adolescens plus minus septem annorum Anno 1667. in Æstate cum aliis coætaneis lusitans, & clavum æneum, quo ephippiarii utuntur in ore tenens, incautius deglutivit & per asperam arteriam attraxit ; hinc magna respirandi difficultas subsecuta est , loqui non potuit, ita ut suffocari videretur ; vomitu excitato, liberiores spiritum ducebat, manente in pectoris latere dextro clavo deglutito ; dolorem postmodum sensit continuo punctorium, sitis erat magna, præsertim si paulo fortius obambulando vel currendo se movebat ; inter dormiendum murmura prodibant, instar catulorum, ut ajebat, ejulantium , interdum noctu ex ore sanguis effluebat : hoc continuavit ultra duos annos. Anno 1669. die 8. Octobr. una cum patre Rhenvium ambulavit ; in reditu ab ipso ad celerius eundum incitatus est : Sequenti die rigor febrilis ipsum invasit, subsequente æstu maximo ; ad tactum erat calidissimus , dolor punctorius intolerabilior erat, tussiebat : ad eum hoc ipso die fui vocatus ; suspicabar primo intuitu, pleuritidem esse : (pleraque enim signa aderant,) donec de clavo deglutito edoctus fui, adhibitis medicamentis, ex artis præscripto, suppurantibus &c. nono ab invasione die videlicet 17. Octobris clavum cum tussi pure involutum ejecit : ab illo tempore prædicta symptomata omnia remiserunt, ita ut post usum detergentium & consolidantium nunc commodissime vivat : Clavum aliis ostensurus servavi.

VII. Differentiæ Empyematis variæ sunt, desumptæ vel à *Differentia.*
 subjecto, vel causis, vel accidentibus. A subjecto; pus vel tota
 Thoracis cavitatem occupat, & in utroque latere, dextro &
 sinistro colligitur; vel in unico tantum, sive dextro sive sinistro:
 id quod inspectio cadaverum hoc affectu defunctorum docet.
 Quoad causas antecedentes: insequitur Empyema vel inflamma-
 tiones; ut Peripneumoniâ, Pleuritidem, Anginam: vel sine
 prægressa inflammatione incipit; ut post Vulnera inflicta, vaso-
 rum pulmonum & Thoracis ruptiones, catarrhos, &c. Quoad
 causam conjunctam s. ipsam materiam morbificam: vel merum
 & laudabile pus continetur, atque Empyema verum ac legitimum
 constituit: vel materia quædam purulenta est, & puri tantum
 analoga; hæcque vel mitis & benigna; vel acris & insigniter fœti-
 da, inæqualis &c. unde spurium s. nothum Empyema vocatur.
 A magnitudine; suppuratio alia major, alia minor.

VIII. Inter symptomata hunc affectum sequi solita, com- *Symptomata.*
 munissimum & quasi individuus comes est Dyspnœa, major vel
 minor, pro varia materiæ morbificæ conditione, quæ partim
 pondere suo pulmonibus incumbens, spatiumque pro eorum ex-
 tensione concessum angustius reddens, partim portione aliquâ
 per porosam Pulmonum substantiam in ductus tracheales tran-
 sumtâ, respirationis vias coarctans infarciensque, dyspnœam in-
 ducit: accedit, quod ex pure collecto, fœtoris interdum non ex-
 perte, vapores impuri, putridi cordique noxii, eo delati, respira-
 tionis usum reddant urgentiorem. Febris lenta quidem, conti-
 nuò tamen infestans, interdum mitior noctu vero vehementior:
 à vaporum ex materia purulenta communicatione, qui in corde
 accensi febrim inducunt. Hanc comitatur Sitis ferè perpetua,
 partim à calore febrili, partim à vaporibus putridis ad linguam
 ascendentibus, exsuscitata. Tussis frequens & valde molesta,
 cum sputo plerumque purulento, oritur, quia pus bronchiorum
 tubis vel ipsis pulmonum vesiculis impactum, nervos fibrasque
 nerveas per pulmones distributas irritat, ita ut musculis pectoris
 constrictivis, molestiæ hujus amovendæ gratiâ, in consensum vo-
 catis, in contractiones vehementes & sæpius iterandas adigan-
 tur, donec materia ductibus trachealibus inhaerens excussa sit:
 Interdum nihil effatu dignum expuitur & tussis tantum sicca est,
 B propter

propter puris crassitiem, ob quam angustiores pulmonum tubulos subire nequit. Appetitus dejectionem causantur vapores: qui vel ad ipsum ventriculi orificium delati, illud intemperanter afficiunt, vel ad linguam & palatum ascendentes, ob communem tunicam, idem in consensum trahunt: his accedit Spirituum dissipatio & languor, ob quorum defectum ciborum inopia non sentitur. Eadem hæ causæ cordi communicatæ, anxietates, lipothymias aliæque excitare valent: ad cerebrum vero transmissæ, inquietudines, vigilias, cui continua tussendi cupiditas symbolum addit, inducunt: verum de his inter signa pluribus agemus.

Signa diagnostica,

IX. Signa Diagnostica vel Affectum patefaciunt, vel ipsius Differentias distinguunt: quæ affectum demonstrant, duplicis sunt generis; quædam enim vel recentem & incipientem prænuntiant: quædam verò diuturnum & confirmatum indicant. Quæ recentem affectum edocent, sunt: Si morbi Thoracis, ut Pleuritis, Peripneumonia, Angina, item vulnus inflictum, aliive affectus interdum has partes occupantes, quibus Empyema succedere solet, prægressi, non rite judicati sint, aut opportunis adhibitis remediis non cesserint, è contra verò suppurationis signa accesserint: ut Febris exacerbatio & augmentum: *Dum enim pus conficitur, febris intenditur juxta Hipp. aph. 47. §. 2.* Rigores superveniunt, dum à purulentis sordibus partes membranosæ insigniori sensu præditæ, vellicatæ, atque ad molestiam à se propellendam magnopere provocatæ, partes vicinas in consensum trahunt. Progressu temporis dolores præexistentes quadantenus remittunt, ponderis verò & gravitatis quidam sensus succrescit, teste *Hipp. 2. progn. 58.* Horum causa videtur, quòd humor putredinalis per partem inflammata dispersus adhuc atque diffusus, acrimonia sua fibras carneas erodendo, majorem quidem doloris, minorem verò ponderis sensum; putrefactus autem atque in cavitate sibi formata collectus & cumulatus, majorem gravitatis sensum, minorem verò dolorem inducat. Imminuitur sputi copia ob metastasin materiæ morbificæ ad alium locum. Accedunt spirituum languores, qui vel non generantur, ob organorum, spirituum generationi dicatorum vitiatam dispositionem; vel geniti dissipantur à calore febrili in totum

tum corpus diffuso. Denique si intra 14. dies materia non expurgatur, major erit Empyematis suspicio, præsertim cum respiratio redditur difficilior. Pectoris tandem gravitas, circa regionem præcipuè diaphragmatis augetur, ob puris majorem indies collectionem. Ultimò materiæ purulentæ *ὀδαισμός* & molestiæ sensus è corporis situ mutato percipitur. Hæc recentem affectum patefaciunt. Diuturniorem verò & consummatum significant; Febris lente perpetuoque infestans, quam partim hæticam, partim putridam dicunt; Putridam, ob vaporum ex pure putridorum exhalationes similem febrem inducentes, & quod habeat signa putridarum: Hæticam, quum hæc plerumque partium internarum inflammationes sequi soleat, ut constat ex *Gal. 1. de diff. febr. cap. 9.* Febrim hanc interdium mitiorem, noctu vero vehementiorem esse, supra diximus; quoniam nocturno tempore, ut *Senn.* probè monet, pus magis elaboratur, ob caloris & spirituum ad interiora retrocessum. Sudores multi, sed inutiles oboriuntur. Sitis urget. Tussis molesta, interdum sicca, interdum purulenta infestat. Appetitus ciborum dejicitur. Anxietates & totius corporis inquietudines exsurgunt. Genæ rubent ob vaporum à putredine exsurgentium acrimoniam & caliditatem, quæ faciem calefacientes, sanguinis affluxui ansam præbent. Temporis progressu oculi cavi redduntur, ungues manuum curvantur. Phlyctenæ tandem s. pustulæ erodentes in corpore, maximè verò circa pectus erumpere solent, à puris parte subtiliore, saniosiore, & acriore ad cutim propulsa. Signa quibus Differentiæ distinguuntur, & quidem quoad Locum, sive utra pars Thoracis laboret? colliguntur, primo ex majore vel minore caliditate: in quo enim latere major observatur, ex puris collectione eam provenire conjiciendum, adeoque partem illam esse affectam: quamobrem *Avicenna* linteam madefactum in utroq; latere applicare jubet: citius docens exsiccari, quod supra partem affectam positum est. Deinde ex faciliiori aut difficiliiori decubitu; faciliior siquidem is in partem affectam quam sanam ob puris pondus illi incumbens. Si hæc utrinque sentiantur in tota Thoracis cavitate pus contineri inquit *Hipp. 2. progn. 59.* Cognosci præterea poterit ex affectibus præcedaneis; ut si à pleuritide vel vulnere ortum sit, in ea parte

pus collectum esse judicandum est, in qua morbus existit: Si Anginæ aut Peripneumoniæ successerit, utrumque latus ut plurimum occupatum esse suspicio erit. Addit *River. Prax. Med. lib. VII. c. 4.* in latere affecto tumorem plerumque œdematosum apparere, ex tenuiore materiæ collectæ portione in Thoracis musculos redundante. Antecedentium causarum, quas ferè semper morbos prægressos esse diximus, signa ex propriis capitibus sunt desumenda. Materiæ denique morbificæ sive causæ conjunctæ conditio cognoscitur ex puris ejecti foetore, inæqualitate aliisque accidentibus; item ex prægressis affectibus, ut si peripneumoniæ, pleuritidi, anginæ superveniat, pus esse verum legitimumque Empyema; si autem destillationi, contrarium statuendum.

Signa prognostica.

X. Signa Prognostica Hippocrates diligentius annotavit, quæ ex ipso nobis repetenda. Ita autem ille in *Prognost. sive Prænotionibus* in genere. *Ex his* (quibus scilicet pus erumpit in thoracem) *maximè superstites manent hi, quos febris eodem post eruptionem die dimiserit* (id est, ut notant interpretes, quibus mitior facta fuerit febris) *Et qui cibos cito appetiverint Et à siti liberati fuerint*, (quod non fit, nisi pus sit bonæ notæ & in exigua quantitate) *Et si venter parva Et compacta egresserit, Et pus album, læve Et ejusdem coloris fuerit, Et à pituita liberum Et citra dolorem ac tussim fortem repurgetur; ac optimè quidem Et celerrimè ita liberantur.* Sin minus, hi quibus proxima his contigerint. At verò intereunt, hi quos febris non dimiserit, aut ubi ipsos dimisisse putata fuit, rursus recalescens apparuerit. Et qui sitim quidem habuerint, cibos autem non appetiverint, Et si venter liquidus fuerit, Et pus pallidum sive viride Et lividum expuerint, aut pituitosum Et spumosum. Si hæc omnia contigerint, pereunt. Quibus verò ex his quædam accesserint, quædam non, horum aliqui intereunt, aliqui in multo tempore superstites evadunt. Quibus consona habet in *Coacis prænot.* Edit. Lind Tom. I. p. 562. *Aphor. 15. s. 5.* ait: *Qui ex Pleuritide Empyri fiunt, si à ruptione Empyematis intra dies quadraginta repurgentur, liberantur, alioquin transeunt in tabem.* Ubi nota, diem quadagesimum terminum constitui vacationis, non quod nihil penitus puris superesse debeat, siquidem æger evasurus sit; sed quod tanta copia vacuata esse debeat, ut reliquias natura facile vacuare queat.

queat. *Aphor. 27. §. 6. hoc habet: Quicunque Empyi uruntur aut secantur, si pus aut aqua universim effluerit, omnino moriuntur.* Noxia enim alteratio subitanea, animi deliquium, virium jactura & mors in hoc casu se invicem excipiunt. *Aph. 44. §. 7. Si Empyis quum uruntur aut secantur, purum & album pus effluat, evadunt, si verò subcruentum fœculentumque & fœtidum, pereunt.* Prius enim phænomenon naturam victricem & viscerum integritatem, posterius naturam victam & corrupta viscera notat. *In Coacis prænot. Edit. Lind. T. I. p. 563. Quibus, dum concutiuntur pus cœnosum & graveoleus prodit, plerumque pereunt (quia scilicet corruptionem significat.) Ibidem: Quibus à pure specillum coloratur velut ab igne, plerumque pereunt.* Summam enim acrimoniam, quæ sæpè non sine malignitate, indicat. Aliàs periculosius est si pus utrumque pectoris antrum occupet. Si unum solum, periculum majus, si sinistrum: illud, quia toti pulmones purè conspireantur: hoc, quia sinister cordis ventriculus nobilior. Quo magis implentur cavitates thoracis, eo majus suffocationis periculum unde *Galen. l. 4. de loc. aff. c. 7. ait: Quibus in magna puris copia intrathoracem & pulmonem collecta, totus thorax in respiratione attollitur, celerrimè suffocantur.* Sæpè Empyema transit in phthisin: ratio est, quia pus sæpè retinetur, id est, non satis maturè aut satis copiosè vacuatur.

XI. His præmissis ad ipsam affectus Therapiam transeundum, quæ ut recta methodo instituatur à tribus indicationibus Præservatoria videlicet, Curatoria & Vitali desumenda, non neglectis interim urgentioribus symptomatibus. Præservatoria respicit causas tum antecedentes tum continentes. Antecedentes, quæ ferè semper, ut dictum, sunt morbi alii prægressi, omnino considerandæ sunt. Ut tamen singulorū curationem hic repetamus instituti nostri ratio non permittit. Respicimus potius ad causam continentē s. ipsum pus in Thoracis cavitatem effusum collectumque, quod sui remotionem s. evacuationem indicat: fitque vel sensibiliter, vel insensibiliter sive diaphoresi, quam tamen ob materiæ crassitiem, lentorem, copiam atque situm intra Thoracis parietes interiorē, quo medicamentorum vires difficulter penetrant, vix sperare licet. Sensibilis ergò evacuatio aptis præsidiiis perque loca convenientia est procuranda. Antequam verò ad præsidiorum

materiam descendamus , inquirere lubet, per quæ loca quoque transitu pus egeri consueverit. Diverſæ quidem ab Artis noſtræ Proceribus deſcribuntur viæ , vix tamen ſenſibus patentibus : Una quatenus materia purulenta per ſpongioſam pulmonum ſubſtantiam ductusque eorundem cœcos , admirabili naturæ inſtinctu tranſumta, atque ad bronchiorum tubulos tranſmiſſa, per aſperam arteriam ipſumque os beneficio tuſſis rejicitur. Verum , modum hunc alii controvertunt , cum impoſſibile ipſis videatur, pus aut purulentam materiam à ſpongioſa pulmonum ſubſtantia imbibere , præcipuè , quoniam , experienciâ conſtet, in Hydrope aut vulnere Thoracis , Pulmonibus illæſis , neque aquam neque ſanguinem rejici ; Addunt, contra naturæ œconomiam quoque videri , ut corruptelam exterius genitam, intus ad nobiliſſimam partem derivet. Aſt has rationes nos non moramur : præterquam enim quod propoſita noſtra ſententia graviffimorum Virorum , ut *Hipp. 2. Progn. 63. Galen. 5. de loc. aff. Aët. tetrab. 2. ſerm. 4. c. 65.* & plerorumque longo rerum uſu celeberrimorum authoritatibus confirmata ſit, fidem indubitatam facit quotidiana experientia, quâ comperimus, Empyicorum ſputum medicamentorum expectorantium ope inſigniter promoveri , imò plurimos eorundem uſu reſtitui. Ratio denique non deeſt, quæ hanc aſſertionem declaret : luce ſiquidem meridianâ clariùs , ſpongioſam & quaſi bibulam, atque ſecundùm *Hipp.* ſpumofam fiſtuloſamque Pulmonum eſſe ſubſtantiam , quæ ambientem materiam per poroſam eos inveſtientem membranam, facili negotio recipiat : Hanc membranam poris benè multis & ſatis magnis præditâ eſſe, anatomica inſpectio docet, confirmatque idem experimentum *Williſii* , qui hydrargyrum ramo pulmonum tracheali infudit , quod membranam ferè totam intus obducens , ubique è poris ruſus erupit. Teſtatur quoque *Walæus* , ſe poros hos piſi majusculi magnitudine in vivorum diſſectione aliquoties obſervaffe. Cùm porrò in poroſam hanc pulmonum membranam ductus bronchiales terminentur, teſte *Malpigh. Schenck. l. 2. f. 255.* clariùs intelligitur quomodo pus in pulmonum lobos recipiatur : poſtquam enim materiæ purulentæ pulmonem ambientis , primò forſan tenuior portio , aſſiduo muſculorum Thoracis ipſiusque diaphragmatis motu, haud parum adjuta, per dictos pulmonum tubu-

tabulos transitum semel fortita est, continua successione eos facile ita dilatare valet, ut quoque crassiori aditus pateat, & sine pulmonum noxa per os rejici possit.

Præclusâ autem viâ per superiora, natura nunquam otiosa se convertit ad inferiora; & vel per Urinæ ductus; vel per ipsam Alvum noxiam materiam evacuare studet, ut *Galen.* aliique Medici observarunt. Cum verò de viis ad dicta loca res obscura sit, contigit ut varii in varias abierint sententias: *Gal. 6. de loc. aff. c. 4.* statuit, è pulmonum vasis ad sinistrum cordis ventriculum indeque per arteriam aortam ad renes & vesicam transire. Alii existimant, transmitti ad venam sine pari, ἀζυγον dictam, per quam in cavam, inde sive ad renum emulgentes & vesicam, sive ad portam & intestina transferri. Alii, deduci per venas diaphragmaticas. 1. Quia ad infimum diaphragmatis debeat quiescere materia purulenta. 2. Motu septi facile attenuetur. 3. Ejusdem motu oscula apperiantur. Alii, fieri per arterias diaphragmaticas. Hæc verò suis non carent difficultatibus. Nos nisi ad vias occultas & secretos meatus, quos natura in ultima sua subsidia efformat, atque illam *Hipp. in lib. de Alim. ξύρροισιν* & ξύμπνοισιν confugere velimus, cum *Senn. Med. Pract. l. II. p. II. c. 17.* probabile esse arbitramur, materiam purulentam in pulmones prius transumptam in vasa sanguifera resorberi, & sanguinis com meatu per cor & arteriam magnam, vel ad arteriam celiacam & Intestina, vel ad Emulgentes & ipsos renes deponi.

Quod si in hoc quoque opere impedita sit natura, alias sibi quærit vias. Deflectens scilicet ad cutim, abscessum ibi parit, nunc antè, nunc postè, nunc ad latera, quo aut spontè à natura disrupto, aut artis auxilio aperto, universum pus in Thorace collectum evacuari potest: id confirmat non vulgaris observatio ab Ampliff. & Excell. *D. D. Wepfero*, Viro omni elogio majore annotata, de puero decem annorum, à casu Empyico factò, cui post aliquod tempus, è tumore sub scapula dextra aperto Empyematis materia salutariter fuit evacuata. Simile ferè exemplum refert *Barth. Hist. Anat. cent. I. obs. 60.* de tumore in Puella sexenni mox infra papillam sinistram aperto. Per Umbilicum materiam purulentam in thorace antè collectam salubriter

briter evacuatam vidit *Tulp. obs. l. 2. c. 6.* Adeò nihil non tentatum relinquit sagax providaque rerum natura, antequam dissolvatur fabricæ humanæ compages. Manifestiores tandem dantur viæ, cum sectione aut unctione ad puris copiam eximendam paratur vulnus; qua de re postea pluribus.

Hæc obiter de transitu materiæ morbificæ: Præsidia ex triplici auxiliorum fonte Diætetico Viz. Pharmaceutico & Chirurgico depromuntur. Cum verò puris evacuatio per sputum facilius speranda sit, quàm ad alia loca minus manifesta, illud promovendum tum internis tum externis: Ita tamen ut in horum usu respiciamus ad causæ morbificæ consistentiam & conditiones: hæc, cum plerumque crassa sit lenta, viscida, vias propterea facilè obstruens, requirit talia quæ partium sint tenuium, ac proinde vim obtineant attenuandi, incidendi, abstergendi, viasque reserandi, quæque fibras pulmonum nerveas irritando expectorationem promoveant, Expectorantia ideò communi nomine appellata: hæc duplici modo operari dicuntur, quum eorum virtus duabus viis ad pulmones deferatur; quorundam enim, postquam ore assumpta fuerunt, particulae nonnullæ activæ immediatè atque integris viribus per laryngis rimulam destillant, dictosque affectus edunt, ut sunt linctus & tabellæ diutius in ore detentæ, vapores item & fumi cum aëre inspirati: Quædam, & major quidem pars, per plures ambages eundo vim suam pulmonibus communicant: massæ enim sanguinæ commixta, dum horum particulae ab ea subigi nequeunt atque assimilari, mox tanquam partes heterogeneæ & non miscibiles ex vena arteriosa in pulmones transeunt, ubi ἐνέχυται suam exerentes, expectorationem dicto modo promoveant: horum tamen vis longiori transitu insigniter infringitur, nisi prorsus obliteretur; quo fit, inter cætera, ut plerisque Thoracis affectibus tam ægrè medicina paretur. Si forsan pus biliosum acre aut erodens sit, Thoracica leniora & temperatiora admisceantur. Formulæ hunc in usum tales parari possunt.

℞. Syr. Capill. Ven. jujub.
scabios. hed. terr. ā ʒj.

Oxym. simpl. ʒiʒ.

Loch. san. & exp. ʒj.

M. ad Vitr.

S. Brustsaft.

De hoc sæpius cochleare unum
capiat sensim deglutiendo.

℞. Rad. Tuss. ʒj. Liquir.

Enul. camp. Ireos fl. ā ʒiij.

Herb. Hed. terr. marrub. alb.
veron. ā M. j.

fl. viol. bell. min. ā. p. ij.

sem. anis. fœnic. ā ʒj.

Pass. Corinth ʒiʒ. Jujub. p. 3.
coq. in aq. com. Mjß ad 3tiæ conf.
in col. diss.

Syr. capill. Ven. ʒiij.

M. f. Apoz. clarif.

Trancß zum Aufwurff.

singulis mane & vesperi hau-
riat ʒiij. vel iiij.

℞. Conf. Veron. Farvar.

Bellid. min. hed. terr.
ā ʒʒ.

Rad. Helen. cond. ʒvj.

spec. diair. simpl. ʒj.

fl. sulph. sacch. ʒʒ.

croc. or. gr. vij.

cum syr. jujub. f. Mixt. moll. ad
Urc.

f. Latwerg zum Aufwurff.

De quo capiat ad nucis casta-
neæ magnitudinem bis
terve in die.

℞ Spec. diair. diatrag. frig. ā ʒj.

Rad. Helen cond. ʒij.

conf. Alk. ʒʒ.

fl. sulph. sacch. gr. viij.

ol. anis. gutt. iiij.

sacch. penid. in aq. hed. terr.

sol. ʒiij.

f. l. a. Tabel.

f. Brustsaftlin.

Similes plures aliæ remediorum formulæ, pro cujusque lubitu,
concinnari possunt. Quibus verò non proficientibus, validiora
incidentia & attenuantia in usum vocanda, ut oxymel scill. vel,
quod magis commendatur, Oxymel Helleb. maj. Jul, à Gesnero
quoque maximoperè celebratum, quod datur lambendum cum
bacillo liquiritiæ, admixto syr. de hyss. vel loch. san. & exp. ex-
hibetur etiam cochl. r. cum syr. de Erysim. Lob. singulis manè &
vesperi. Non exiguam interdum opem ferre solent Vapora-
tiones & Suffitus, ut antea dictum: Vaporations parantur ex
simplicium, ut Rad. helen. irid. fl. herb. hyssop. calaminth. capill.
Ven. fl. acac. sem. anis. fœnic. &c. decoctione, cujus vapor per in-
fundibilum excipitur. Suffitus fiunt, ex succin. alb. Benz. pulv.
ros. r. sant. r. mastich. thur. ladan, sulph. &c. ex quibus trochisci pa-
rantur, quorum fumus naribus hauritur. Extrinsecus imposita
Fomenta, Emplastra, Linimenta &c. expectorationem aliquo
modo

modo juvare creduntur : quæ propterea paranda ex iisdem vi
attenuandi , incidendi , abstergendi præditis , ut rad. alth. lil. alb.
ireos. helen. herb. hyss. marrub. scab. malv. fl. cham. melil. croc.
sem. fœnugr. lin. item oleis , ut ol. Amygd. d. charnem. lil. alb. vel
penetrantioribus , ut ol. irin. nard. aneth. & similib.

Cum ad vias Urinarias inclinare materia purulenta cogno-
scitur , quod tamen rarius contingit , & non nisi à robore ipsius
naturæ , hunc naturæ conatum juvare monet *Hipp. aph. 21. s. i.*

*Quæ ducenda sunt , eo ducenda sunt , quo maximè natura viam af-
fectat.* Motus verò hic accelerandus , ne materia , partes nobi-
liores sensuque excellentiori præditas permeans , tardiore transi-
tu easdem nimio opere lædat : quamobrem diuretica tempera-
tiora in usum vocanda , ut rad. aperient. herb. pariet. capill. Ven.
chæref. hed. terr. fl. acac. sem. 4. frig. maj. mil. solis , fœnic.
nucl. persic. amygd. fraga , cicer. rubr. ficus , Thereb. ocul.
cancr. mand. luc. pisc. &c.

Si ad alvum deducatur pus à natura , duo nobis indicantur ;
ut scil. naturæ motum adjuvemus , & ipsa intestina ab exulcera-
tione præmuniamus : Utrumque præstant lenientia dicta , quæ
fæces in Intestinis blandè subducunt , noxiosque humores ab-
stergunt. Horum quædam ore assumuntur , ut Alimenta medi-
camentosa dicta , ut Jura carniū pingua , lact. endiv. bet. fol. bellid.
min. in lacte cocta , pruna , Poma coct. Pass. &c. Medicamenta ,
ut Syr. ros. simpl. viol. simpl. de mann. pulp. cass. rec. extr. ta-
mar. prun. &c. Quædam in anum injiciuntur , ut Clysteres ex
emollientib. & absterg. ut rad. alth. lil. alb. herb. malv. pariet. fl.
cham. melil. sem. lin. fœnugr. & similib. vel ex lacte solo , item
decocto hord. vel etiam jure carniū , additis butyr. ol. sal. q. s.

Si tandem materiam morbificam insensibiliter discutere
velimus : quamvis plerunque , ob rationes superius traditas ,
suecessum vix sperare liceat ; tentari id potest , vel decoct. ex
Lign. Sassafr. Guaj. rad. sarsap. chin. visc. quern. rad. liquir. &c.
vel pulv. ex C. C. præp. Antim. diaph. ocul. cancr. dent. apr. mand.
luc. pisc. sal. C. C. item spir. C. C. vel salis Amon. Bezoard. min.
& similibus.

Non improbandus quoque usus Theriac. Andromach. &
Mithrid. Damocr. Extrinsecus admoventur fomenta , empla-
stra &c. ex superius jam propositis parata.

XII. Quod si dictis modis optatus eventus non succedat, quemadmodum sæpissimè non succedit, ad alterum præsidiorum fontem, ipsas scilicet Chirurgicas Operationes, accedimus, ad quas nonnulli in hoc affectu jam facto, tanquam unicum & præsentissimum remedium, confugiunt. Agmen inter has ducunt ipsius Thoracis aperturæ, Græcis *Ἀσκήντησις*. Vene-sectionem enim Virium prostratio, omnibus Empyis, teste *Gal. 4. de loc. aff. c. 4.* familiaris, non admittit. De Thoracis verò paracentesi perspicuè nos edocet *Fabr. ab Aquap.* cujus methodum & nos servantes, sequentia considerabimus. Primò utrum; Deinde quo tempore Thoracis apertio sit celebranda; Tertiò Locum in quo sit instituenda; ultimò ipsum operandi modum breviter proponemus. Utrum Thorax sit aperiendus, docet tum præsentia ipsius indicantis sive morbi jam facti, quod ex superius traditis signis cognoscitur; tum vires ægri adhuc firmiores, quæ ex pulsuum robore æstimari possunt: Si verò vires sint prostratæ, pulmones jam labem contraxerint, respiratio brevis & anhelosa, pulsus debilis & celer, cum sudore frigido, si denique superveniat diarrhœa, cum frequentibus animi deliquiis, operatio hæc ob statum planè deploratum omittenda, & satius Medico ægrum non vulneratum sinere mori, ne occidisse videatur, quem sua fors interemit. Denique suadet id materiæ morbificæ conditio, quæ, ne si copiosa sit, ægrum suffocet, vel prava aliqua qualitate prædita, partes vicinas corrumpat, inque *φθίσιν*, immedicabile plerunque malum præcipitet: ex *Hipp. aph. 15. §. 5.* educenda. Quando agendum sive tempus, monstratur, si pus suprà dictis modis expurgari nequeat. Operatio autem hæc acceleranda, neque quadragesimus dies expectandus, ne ex diuturniore mora partes lædantur; *ἀπερόσως* enim & imprudenter se gerit

- - - - - feraque ope vincere vata

Nititur & Medicas exercet inaniter artes,
quicumque ulcere in pulmone jam confirmato, & respiratio-
nis organis insigniter læsis, Chirurgicam manum audet inferre.

De Loco apertionis magna est controversia inter Medi-
cos, dum alii alium eligunt. *Hipp.* faciendam esse præcipit in-
ter tertiam & quartam costam, ab inferioribus numerando, ut

materia faciliorem exitum inveniatur. *Amat. Lusit. inter 2. & 3. cent. 5. curat. 61. & Henr. Smet. Misc. l. 7. Willis. inter 6. & 7. Paul. Aegin. inter 5. & 6.* à superioribus incipiendo; quem *Fabr. ab Aquap.* sequitur, quum iste locus magis sit aptus, ad vitandam partium internarum læsionem: qui locus & nobis commodissimus videtur. Non verò indifferenter in spatiis his sectio est instituenda; sed ut arteriarum, venarum & nervorū in suis sinubus secundum longitudinem costarum, in inferiore earum parte excurrentibus, læsionem avertamus, potius propè costas inferiores, quàm superiores facienda; non quidem recta, sed oblique posteriora & superiora versus, secundum ductum fibrarum musculorum intercostalium: potius quoque fieri debet apertio in anteriore pectoris parte, quatuor vel quinque digitorum à sterno distantia; quum locus iste musculis minus sit obsessus, & pulmones posteriora versus magis reflectantur, quàm anteriora. Modus operandi duplex est; fit enim vel sectione, quatenus Scalpello ex altera parte obtuso, altera aciem habente, atque ad cuspidem modicè recurvato, *σκολομαχαίρῳ* dicto, ut pulmones vitentur, latus perforatur: Vel cauterio peragitur. Priori modo ita instituitur, Scalpellum (panniculo obligatum, mōnente *Aquap.* quod habet ex *Hipp. 2. de morb. cap. de Peripn.* Vel ad hunc usum ita paratum, ut ad unguis digiti mensuram summa ejus pars promineat,) sensim, ægro in expirationis actu constituto, ut pulmones concidant, loco apto & prius notato, oblique superiora & posteriora versus usque in Thoracis cavitatem adigitur: Si verò in teneris aut meticulosis cauterium requiratur, post escharam excitatam Scalpellum, eodem quo prius modo, in cavitatem immittitur; quod cognoscere jubet *Fabr. ab Aquap.* ex puris vel aëris egressione, Scalpelli partis intronissæ consideratione, & quando ad cuspidem cultelli nulla sentiatur resistentia. Incisio parva sit; ne materia simul & semel egrediatur, quod *Hipp.* periculosum proclamat; ne aëris per majus foramen uberior ingressio partes lædat; nisi forte materiæ crassities majorem incisionem requirat. Thorace hoc modo perforato, per canulam argenteam aliquantulum incurvatam, nec nimis longam, ne pulmones attingat, vulnere immissam, purulenta materia intrus collecta per vices est egerenda: Quod si tamen sine insigni

virium jactura fieri possit, totius evacuatio est acceleranda, ne puris reliquæ, ab aëre inter evacuandum subingresso, magis corrumpantur: hinc liquor traumaticus & abstersivus bis terve in die est injiciendus, & qui manè infusus ad vesperam evacuan- dus, qui vesperi, mane, Post cannulam exemptam, vulnus tu- rundâ ex stuppa vel lino crudo confectâ, & filo alligatâ obturan- dum; si pus per vulnus inflictum non liberè exeat, æger in partem incisam inclinans tussire aut corpus molliter concutere debet; vel materia crassior liquore traumatico est eluenda: his verò nil proficientibus instrumento, quod Græci πυλὸν vocant, extra- hendam esse præcipiunt.

Quod si materia purulenta ad cutim vergat tumoremque excitet, cataplasmatibus & Emplastris suppurativis tumor est maturandus & aperiendus, atque aliorum ulcerum more tra- ctandus.

Intus, ad majorem puris abstersionem & ipsius sanguinis depurationem, assumunt remedia traumatica dicta, quæ variè parantur v. g.

℞. Rad. Rub. tinct. ℥j. Liquir.	℞. Aq. Agrimon. beton.
symphyr. ā ℥ss.	Marrub. Veronic.
Herb. agrim. vinc. perv. be-	Syr. de pilos.
ton.	Symphit. Fern. ā ℥j.
sanic. pilosell. ā mj.	M. ad Vitr.
fl. bellid. min. hyper. ā p. j.	pro 2. dosib.
cicer. rubr. ℥vj. Pass. corinth.	℞. Ocul. cancr. pp.
℥ij.	C. C. ust. pp. ā ℥ij.
Coq. in aq. font. lib. iv. ad 3tiæ	Margar. pp.
conf.	Corall. rubr. pp. ā ℥ss.
f. Apoz.	fl. sulph. sacch. ℥ss.
De hoc sumat ℥iij. bis in die.	Tab. m. ch. pl. ℥vj.
	M. ad scat.
	de quo bis in die capiat ℥ss.
	cum dicta potiuncula.

XIII. Cùm hoc affectu decumbentes maximè operè omnium virium languores percipiant, tertia Indicatio, Vitalis nimirum præcipit vires attritas resarcire, spirituum languores refocillare, ipsumque

ipsumque cor confortare; quæ nobis præstant, tum medicamenta, tum proba victus ratio. Ex medicamentis esse possunt, Aq. mellif. ros. fl. acac. cinam. syr. è cort. citr. fl. tunic. conf. alk. marg. pp. corall. r. pp. & similia. *Victus ratio* ex diætæ præscripto desumenda.

XIV. Symptomatibus urgentiori bus, quæ communiter esse diximus, dyspnœam, tussim, febrim lentam, sitim, vigilias, tandem occurrendum; horum autem quorundam remedia superius fuere exposita: *Dyspnœa* siquidem atque *tussis* eadem requirunt expectorantia, quæ ad materiæ purulentæ per sputum egestionem conferre diximus. *Febris*, etsi absque causæ suæ, id est, materiæ purulentæ remotione curari nequeat, ejus tamen calor temperandus est, ne partes nimio perè exsiccet, viresque prosterнат; quem in usum propinantur aquæ, Julepi, Syrupi, potiunculæ refrigerantes, quorum materia passim prostat; Eadem & *Sitim* restringere valent, quibus addi possunt, quæ loco potûs ordinarii inferiùs proponemus. *Vigilia* interdum gravius urgent, quæ, si diuturniores sunt, spiritus dissipant, viresque prosterنunt, ut puris expectorationi pares non sint: propterea quies moderata arte procuranda: Conducunt præ cæteris hypnotica mitiora, quæ suaves ἀναδυμνάσεις ad caput mittant, & calidos acresq; vapores, ex purulenta materia exsuscitados, spiritus animales perturbantes, attemperent, ut sunt Aq. nymph. lact. portal. Syr. viol. papav. rhœad. Amygd. d. Sem. 4. frig. maj. papav. alb. nucl. persic. &c. Ex quibus formantur Julepi, Emulsiores. Maximè verò hic fugienda sunt opiata, quæ spiritus animales sopiendo atque extinguendo, respirationis actus extenuant atque depri-munt; cum illi ad puris molestiam à respirationis organis amoliendam, fortiores requirantur.

Diætæ.

XIV. Tertius Præsidiorum fons Diætam nobis proponit s. commodam victus rationem, maximè necessariam, & quæ reliquis artis remediis, ut prodesse possint, subscribere debet, docente *Gal. lib. de Theriac*. Versatur autem ea, ex Medicorum doctrina, circa sex rerum non naturalium, ita dictarum, legitimum usum. Primum itaque, ut ordinem consuetum observemus, conducit Aër in activis qualitatibus temperatus, in passivis siccus, qui temperatura sua copiosam puris colluviem insensibiliter minuere

nuère

nuere valeat: hac enim de causa *Averr. 7. coll.* dixit: Veteres consuevissent, Empyicos in Arabiam & Æthiopiam mittere ob cœli siccitatem. Iisdem qualitatibus & reliqua victus ratio polleat, sit nempe siccans, attenuans, abstergens: Eligunt propterea carnes avium assatas, ut Gallinarum, pullorum gallinaceorum, phasianorum, perdicum, & aliarum montes inhabitantium: vel elixas & asparago, fœniculo, cœpis & aliis attenuantibus conditas. Sint præterea cibi *εύχυμοι, εύπεπτοι & πολυτρόφοι*. Fructus & legumina, cum difficilioris sint concoctionis & facile corrumpantur, fugienda. Lactis usus, præcipuè Caprilli & Asinini, Empyicis commodus est, quum parte suâ serosâ pus abstergat & expectorationem promoveat, butyrofa probè nutriat. Pro bellariis uti possunt amygd. d. pistach. nucl. pini, pass. caric. ex quibus etiam potus ordinarii parantur, forma Emuls. eo fine commendatur quoque Decoct. hord. vel passul. aut liquirit. Laudatur præterea hydromel, ob insignem abstergendi vim. Vinum tenue, oligophoron, nisi febris vehemens sit, concedi potest: fugiendus potus frigidus; item acetum & reliqua austera. Somnus sit moderatus, ut vires reficiantur. Quies corpori concedatur, ne vires labascentes amplius conterantur. Alvus, si pigrior fuerit, crebra enematum injectione sollicitanda. Omnia graviora animi pathemata, præsertim metus & tristitia coërcenda.

SOLI DEO GLORIA.

1870